

•sanjvwenz•

Faexsaenz

神树

Yiz Ciz / 余执



Faexsaenz laemx lo! Faexsaenz laemx lo!

Ngoenz ndeu haetromh, gyoengq-vunz Hawvenh couh hemqcaca. Gyoengqde bouboux doeksaet, bouboux roxnyinh geizheih.

Gyanghaw Hawvenh miz goraq ndeu, cijaeu daengz gvaq Hawvenh, couh ndaej raen go faex neix, cijaeu raen gvaq go faex neix, mbouj miz boublawz mbouj roxnyinh geizheih, mbouj miz boublawz mbouj doeksaet damz: "Go faex neix seizlawz maj youq cingq yanghaw mbouj faenz bae ni?"

Goraq neix sang samcib mij baedauq, goekfaex hung lumj aen doengjraemx nei, geijcib bi roxnaeuz geij bak bi maj youq gizhaenx, nyefaex mbouj lai, mbawfaex dauq mbouj noix, bi daengz haemh mbawfaex cungj dwg heuauau, gig noix loenq mbaw. Cuih dem cuih roengzdaeu, vunz gwnzhaw, vunz mbanj gya mbanj gyawj cungj heuh goraq neix guh faexsaenz.

Aiq dwg lau ciemq roen, lau git vunz bae ci vaij ba, lajgoek goraq mbouj humx saek yiengh, goek faex seiqmienh hoengqcwctwt.

Hawvenh gek sam ngoenz couh dwg ngoenzhaw ndeu, ngoenzhaw, boub gai byaek, boub gai loz gai lamz, boub gai dangz gai bingj cungj miz. Faexsaenz youq yanghaw, vunz bae vunz dauq, laj goekfaex ndei guh gaicawx, baez daengz ngoenzhaw, boub guh gaicawx couh ganj caeux daengz lajgoek go faex neix daeu ciemq dieg guh gaicawx.

Ndwengeih cibgouj dwg haw-fwen Hawvenh, bi daengz ngoenzneix, boub gya boub gyawj cungj daeu youz hawfwen, yang Hawvenh vunz cien vunz fanh, gyauejgai daengz rienggai cungj dwg boub bae boub dauq ndaetfoedfoed, laj faexsaenz seng'eiq couh engq hoengh lo.

Bi ndeu hawfwen ngoenzhaenx, laj faexsaenz boub gai boub cawx, boub bae boub dauq nauhyied humhum. "Ciiq nap vunz lo, ciiq nap

vunz lo." Sawqmwh dingqnyi miz sing swenj. Dwg boub naihlaux ndeu youq laj faexsaenz cingq cawx gyoij, deng boub baedauq daemj laemx roengz lo, aen ciiq he ngamq hai gvaqdaeu, nap deng faj ga naihlaux. Vunz lailai, sing hemq deih, mbouj miz geijlai boub ndaejnyi miz sing hemq, cijmiz doengh boub youq gyawj aen ciiq haenx gag doxnaeuz fwngz gaem fwngz dawz lanz aen ciiq hwnjdaeu.

Faj gaswix naihlaux deng ci nap sieng cik nyienghdin, lwed laeraeng-raeng, dingqnaeuz youq yihyen yw le cibgeij ngoenz cij ndaej maranz, sai bae haujlai ngaenzcienz.

Daj baez haenx hwnj, gwnz go faexsaenz couh venj miz gaiq baiz ndeu, naeuz mboujcinj youq lajfaex baij dan guh gaicawx lo. Ngoenzhaw daengz, laj go faexsaenz gvengq lo, vunz bae ci gvaq fuengbienh haujlai.

Miz haemh ndeu, gyoengqvunz Hawvenh cingq gwn caeuz, sawqmwh dingqnyi "bum" sing yiengj ndeu, gyoengqvunz gwnzgai bouboux hai-dou okdaeu yawj. Laxlawz dwg aen ciiq ndeu daemj daengz goek faexsaenz bae lo, gyauej ci mbaep vaih liux, boub haici deng sinz daengz gwnzgai bae, lij ndei, vunz mbouj miz maz saeh. Goek faexsaenz deng ci cung ndaej dek bae, mbawfaex loenq rim gwnzgai, gyoengqvunz gwnzgai raen daengz yienghneix, bouboux ndang saenz naj heu, cungj mbouj gamj bae gyawj.

Yungyiemj a, goraq neix mbouj hab louz youq gizneix lo, boub baedauq cungj damz, hoeng mbouj miz geijlai vunz rox, vihmaz mbouj faenz go faex neix bae?

Sou mbouj rox lo, go faexsaenz neix miz gojgaeq bw.

Gou ndaej cibseiq bi couh doeg gauhcungh, aen hagdangz neix couh youq gwnz Hawvenh, seizhaenx gyauejhaw miz aen mboq ndeu, raemx mboq sawdikdik, doeng raeuj hah liengz, seiz rengx mbouj mboek, seiz doek mbouj swng. Gyoengq vunz Hawvenh couh baengh aen mboq neix

daeu gwn yungh. Bien mboq maj miz goraq ndeu, goraq neix mbouj miz boublawz rox dwg seizlawz miz, gyoengq boubgeq Hawvenh cungj naeuz, lij iq seiz couh raen goraq neix lo.

Bien mboq aeu ringonj humx dwk, rin humx mbouj sang, ngamq-ngamq gaeuq vunz guh daengq naengh, boub baedauq baeg le, ndaej naengh bien mboq yietnaiq.

Goraq nanz mbouj nanz couh loenq geij mbaw, baez nanz, ndaw mboq mbawfaex couh lai lo, raemx mboq couh mbouj cingh lo, miz vunz couh naemj faenz goraq neix bae. Dingqnaeuz boub naemj faenz faex haenx cij yienghneix naemjnaemj, caengz dawz fagfouj okdaeu vunz couh laemx youq yangroen lo, gvaqlaeng couh dai bae lo.

Lij dingqnaeuz miz vunz ok haj bak maenz ngaenz daeu guhdoj gvaq, naeuz boublawz ndaej faenz goraq neix roengz couh dawz ngaenz bae. Gwnzhaw miz daeg gaujvaq he dwg boubgyax, de mbouj lau dai, ra fagfouj couh bae faenz goraq, de ngamq raemj geij baez, fagfouj couh mbanq liux, baenzlawz hix raemj mbouj ndaej roengz, de gag bi gyauej buet-deuz lo.

Gij saeh neix mbouj rox dwg caen roxnaeuz gyaj, vunz cungj gangj ndaej gig doeksaet, gangj ndaej gig dwglau, gvaqlaeng caiq mbouj miz vunz doengh goraq neix, doeklaeng vunz gwnzhaw couh heuh garaq neix guh faexsaenz. Baez daengz ciethieq, gyoengq vunz gwnzhaw couh daeu baiq goraq neix, hwnjyeng coemh ngaenzceij, gouz faexsaenz bauj.

Baiq faexsaenz hix mbouj rox lingz mbouj lingz, boub cienz boub, gvaqlaeng miz boub daeu gouz aeu gvan aeu baz, miz boub daeu gouz aeu lwg aeu lan, miz boub daeu gouz geij gungz geij nanh, miz boub daeu gouz dang daeuz, miz boub daeu gouz aeu cienzcaiz..... Laj goraq hoenz yieng yied daeu yied hoengh.

Gaijgwz hailangh le, Hawvenh hwngh'vuengh hwnjdaeu lo, boub guh seng'eiq yied daeu yied lai, gij vunz mbanj gyawjhaw haenx cungj daengz Hawvenh daeu guh ranz youq, aen mboq mwhnduj youq gyauejhaw haenx bienqbaenz youq yanghaw bae lo.

Aen Mboq youq yanghaw, boub bae boub dauq, raemx mboq uq lai youh yungyiemj. Daegbied dwg ngoenzhaw, vunz ganj haw mizseiz roengz ndawmboq bae gwn raemx geij hozhawq, miz boub roengz mboq bae swiq fwngz swiq naj, loengh ndaej gwnz mbaeklae ndawmboq dauqcauq dwg nyapnyaj, dauqcauq dwg namh-boengz.

Cwngfuj gietdingh moek aen mboq bae, ciepe raemx swlaizsuij hawj vunzlai yungh. Miz vunz couh naeuz, moek mboq couh moek mboq, mbouj ndaej faenz goraq bien mboq bae. Moek mboq mbouj faenz faex, baenz-lawz ndaej. Vunz gwnzhaw naeuz: "Go faex neix dwg faexsaenz, boublawz doengh de boubde mbouj dai myaiz hix conh. Ndae, boublawz mbouj lau dai, de couh faenz ba."

Moek mboq lo, geij ci rin, geij ci namh couh denz aen mboq bae lo, mbouj miz byawz gamj faenz faexsaenz, faexsaenz couh yienghneix sohnoengnoeng ndwn youq yanghaw, faen diuz roen guh song mbiengj, aen ci doxbae gvaq mbiengj baihgva gofaex, aen ci doxdaeu gvaq mbiengj baihsuix gofaex, haujlai bi gvaqbae, mbouj raen miz maz saeh.

Baezneix ci daemj faexsaenz, cwngfuj gietdingh baenzlawz hix aeu faenz faexsaenz bae, hawj song cien maenz cingj vunz daeu faenz. Haujlai ngoenz cungj mbouj miz vunz daeu guh, doeklaeng, couh daj dieggyae co aen gihdajvat daeu. Boubhai aen gihdajvat cingq yae haihong, gyoengq vunzmbanj, gyoengq vunz gwnzhaw comz daengz laj faexsaenz, humx faexsaenz baenz geij gien, boub gangj neix boub gangj haenx baenzlawz hix mbouj hawj faenz faex. Hemq le geij ngoenz, faexsaenz lij ciuq gaeuq ndwn youq yanghaw.

Ngauzngauz ngetnget youh gvaq le song bi, ndwencieng youh daengz lo, boub gya boub gyawj cungj dauqranz gvaqcieng. Lajmbanj nauhyied dangqmaz.

Ndwencieng coseiq banhaemh, miz daegcoz ndeu bae ranz caencik, mbwnlaep seiz de hai ci gvaq Hawvenh, aiq dwg mbouj rox yanggai miz go faex neix ba, caj de raen miz go faex neix seiz gaenq guh mbouj gip, aen ci de daemj haeu go faexsaenz bae, faexsaenz laemx roengz lo, ciiq sinz faen bae seiqlengq, boubhaici mbouj miz maz saeh.

Faexsaenz mbouj rox bauj mbouj bauj vunz, hix mbouj rox dwg mbouj dwg lumj vunz lwnh baenzde saenz. Baezneix baenz lo, faexsaenz laemx roengz lo, caiq hix mbouj git roen lo.